



# Bapa meninggal dunia ketika hendak hadiri konvokesyen anak

Oleh **Faizul Azlan Razak** - November 1, 2022 @ 1:50pm  
[bhnews@bh.com.my](mailto:bhnews@bh.com.my)



Pro Canselor UniSZA, Tunku Datuk Nooruddin Tunku Shahabuddin (Dua dari kanan) bertanya khabar dengan Muhammad Hafiz Mokhtar pada Majlis Idul Iltimi Konvokesyen ke - 14 UniSZA di Dewan Al Muktafi Billah Shah, Kampus Gong Badak, di sini, hari ini. Foto FAIZUL AZLAN RAZAK

**KUALA NERUS:** Impian seorang bapa melihat anaknya menerima segulung ijazah ketika majlis konvokesyen di Universiti Sultan Zainal Abidin (UniSZA) hari ini, tidak kesampaian apabila meninggal dunia akibat serangan jantung ketika menginap di sebuah inap desa di sini, awal pagi tadi.

Lebih menyedihkan, Mokhtar Mat Isa, 65, bapa kepada graduan UniSZA, Muhammad Hafiz, 27, menghembuskan nafas terakhir, kira-kira enam jam sebelum majlis itu berlangsung, hari ini.

Muhammad Hafiz berkata, bapanya adalah individu paling teruja hendak menghadiri majlis konvokesyen itu dan mereka menyewa di inap desa dekat Kampung Teluk Ketapang, di sini.

"Ayah paling teruja hendak ke majlis konvokesyen, namun apakan daya hajatnya tidak kesampaian untuk melihat saya menerima segulung ijazah walaupun sudah berada di negeri ini.

"Ayah saya tiba-tiba rebah di inap desa sebelum mengejanya ke Hospital Sultanah Nur Zahirah (HSNZ) dan disahkan meninggal dunia kira-kira jam 1 pagi tadi," katanya ketika di temui di Majlis Idul Ilimi Konvokesyen UniSZA ke-14, hari ini.

Muhammad Hafiz berkata, jika ikutkan majlis konvokesyennya berlangsung hari ini, namun arwah mengajak mereka datang pada Ahad dengan menaiki kereta bersama empat ahli keluarga lain, termasuk ibunya, Salmah Kasa, 64.

"Alhamdulillah, sebelum ayah meninggal dunia, saya sempat juga meluangkan masa bersama ayah di sekitar Terengganu sebelum majlis konvokesyen hari ini.

"Malah, saya ikutkan saja permintaan ayah kerana boleh juga membawanya bersama ibu melawat ke beberapa tempat menarik dan makan malam di sekitar Kuala Terengganu," katanya.

Muhammad Hafiz berkata, jenazah ayahnya dibawa pulang ke kediaman mereka di Kampung Selayang Baru pada jam 8 pagi dan akan dikebumikan di Tanah Perkuburan Islam Kampung Selayang Baru, hari ini.